

Dir. di Museo Arqueologico, sra. Bibi Ruiz

Palabra “baranca” tabata clave pa expo “O Aruba, nos baranca tan stima”

ORANJESTAD - Mañan Museo Arqueologico y MetaCorp lo inaugura oficialmente un exposicion temporario bou titulo “O Aruba, nos baranca tan stima” na Renaissance Mall.

E ta un expo cu a ser organisa den cuadro di 25 aña di Status Aparte y 35 aña di nos Himno y Bandera, y e ta forma parti di un serie di exposicion cu Ministerio di Cultura a plania durante e aña aki.

Directora di Museo Arqueologico, sra. Bibi Ruiz a splica cu dia 16 di maart ultimo Archivo Nacional a habri e prome expo cu ta trata e prome letranan di nos Himno Nacional. Despues UNOCA a habri luna pasa cu un exposicion den e rotonde di Las Americas cu ta e di dos couplet di nos Himno Nacional; y awor Museo Arqueologico lo haya e di tres couplet cu lo haya contenido den forma di imagennan mañan den un lo-kaal di Renaissance Mall.

Tur luna te october venidero lo tin cada dia 18 un expo realisa pa un instancia cultural of un instancia cu ta maneha herencia cultural cu lo dedica un exposicion na e letranan di nos Himno nacional.

Museo Arqueologico a haya e letranan: “O Aruba dushi tera nos baranca tan stima”, y e team di e museo aki a papia internamente con nan por interpreta esey, saliendo for di e coleccion y meta di e museo mes. “E palabra baranca pa nos tabata e palabra clave pa-sobra baranca bo por interpreta hopi cos bou di dje”, asina sra. Bibi Ruiz a bisa na BONDIA Aruba.

E ta indica cu nan a uze pa interpreta e isla, e parti geologico y naturalmente un coleccion grandisimo di artefactonan di piedra cu nan ta cuida y presenta den instalacion mes di e Museo Arqueologico. E ta splica cu esaki ta e punto di salida di e exposicion aki. Nan



ta conta cu apoyo di un team di diseño y nan ta invita hendenan cu no ta di museo pa yuda nan pensa. E biaha aki nan team di diseño ta consisti di Sheidy Feliciano di ATA; e hoben F. Tromp cu ta un voluntario y kende ta lider di nan brigada hubenil di Museo Arqueologico, y e artista Rhyann Oduber. Ademas di dos curadornan di Museo Arqueologico cu tambe ta forma parti di e team di diseño den cuadro di e expo “O Aruba nos baranca tan stima” cu lo keda inaugura mañan. □